

قصيدة يا محبوبه الشاعر: عباس العباسي الطائي

الكلب غيمّ وما يمطر يا محبوبه..
اشما ينكل جدم تتباعد ادروبه

آتعبت من چلمة المکدر ..
اسهرت يمته الفجر ينظر
واذا طيفچ عليه ما مر..
خفت عاذل لفاچ ابشر
خفت من العيون اتنام..
ويضل خالى المنظر
وتضل بس الذياب اتعوص مجلوبه

الكلب غيمّ وما يمطر يمحوبه
اشما ينكل جدم تتباعد ادروبه

خفت من العذیبی ايمشچ اخدودچ
خفت من النسيم ايذبل اورودچ
خفت من الكصيبه اتململ ازنودچ
خفت من الذياب اتزاحم اخدودچ
ونفز من نومنه ونلگاچ مسلوبه

سکرنه ابريحت ازلوفچ ..
اونمنه ابدگت اچفوفچ
وغفینه اينغمة احروفچ
ولا ناطور بات ابصدر مشحوفچ
سفینه احنه چبيره وحيف منخوبه

الکلب غيّم وما يمطر يمحوبه
اشما ینگل جدم تتباعد ادروبه

وخطفوج اعلى متن الخيل
وانه اصرخ واصيح الويل
وين الزلم.. وين الما تهاب الليل
ماواحد فزع وايفرغ از لوفج يمنهوبه

...
محوبه راحت والدمع جرح اخدود الديره
ثار الطلب ضل بالكلب مدفون وآثر غيره
ثارى الجرح يولد جرح للما عرف تدبيره
والريشه من اجناحهه لكن تصيب الطيره
خصمك حكيمك يا كلب والعله ماهى از غيره
دورلك العلتك دوا ولا تضل هيچى ابخيره
خبر هلك.. روح العمامك والسلف
بلچن تجد واحد نشم.. وايشيله عرج الغيره

ما ضاع حگ وما قدر
للى یشد احزامه ويذهب ورا مطلوبه
الکلب غيّم وما يمطر يمحوبه
اشما ینگل جدم تتباعد ادروبه

يلطولچ انخيله نهر كارون يجرى ابراگچ
شوفى الكمر ناگص ضوه دينيه ضوه من ساگچ
جدمچ ذهب صافى جرى اعلى الكاع ياهو الضاگچ
شعرج سنابل من ذهب مدفون بين ازياگچ

سنبل حمر طگه الهوی ..
زلفچ علی الرگبه التوی
وبین من ابعد الضوه
وشفنه اعلى نحرچ.. بستان توه استوه
یاعین زمزم بلصیف.. من عذب مای اریاگچ
یا هو ارتوی؟

الحسرات سهمی والالم.. من شوفتچ کلبی انحرم

یلماسگیتینی ابدوه
ضلیت احن لفراگچ

المن صفه ذاک الحسن
حملت بلشوگ السفن
ضعنچ علی وین انتوه
یاریتنی ریشه چنت
چا طرت ویه انیاگچ
ولو چان عندی من الزلم
صلحین میه اعلى الغلب
فرغتچ من الباکچ

ضل النهر یجری ابحزن.. یتعاتب اویه اجرافه
ویناجل اوراق الشجر.. خایف من الصفصافه
یاریت یاخذنه الهوی.. ریشه اعلى متن اچتافه
لاکن تگل بینه الحمل.. کلمن توگه الحافه

وحتى الغمر حابر وكف.. يضحك على الوكافه
آيس ولف راسه ومشه.. من شاف محد شافه
ومن عادته نور الغمر.. ما يرغب الخوافه
والرمح ما ينگل جدم .. ويه اليخاف اطرافه
اكراب الوكت مل وجزع ..من نوم ليل اسيافه
دينيه حفنه من الضوه.. ويگطع على الخطافه

محبوبه هجرانچ صبر.. مر وتجرعته اسنين
صعبات ايام الهجر.. نمت اعلى حد السچين
عانيت الام وتعب.. واضياع بعدچ تدرين
والعمر ضل يطوى الوكت.. يمشى اعلى روج الماشين
تايه غريب ابديرتى وانشد من المتعدين
بلچن يحن واحد عليه.. وايگلى محبوبك وين
غرگان بلشاطى أصبحت.. والماى حدالساگين
والناس تمشى اعلى الجرف.. اشباح مثل الميتين
محد يمد ايده عليه.. ممنوع مس العدلين
ممنوع وياى الحچى.. وممنوع تنظر بالعين

محبوبه باعونى هلى دلو عليچ الحرمان
محبوبه راحت والدمع غرگ ابيوت السكان
ماتت عصافير الهوى اچانت تغنى الالحن
اوذيچ البساتين اصبحت مسكن اليوم وغربان
وذيچ البلابل هاجرت گامت تحن بلخربان
والعطر راح من الورد محد يشم الريحان
والنخل ما طلع بعد ما دث عليه امريخان
والشوك خضر بلگلب واختنگ ورد البستان

الراكوب شلاع النخل گالووه اهلنه من ازمان
چان الوكت انه وصفه .. شمعہ ابھوی هب وطفه
فوك ايشان
واصبحنه سالوفة زمن نحجيهه كان وما كان

محبوبه يا روح ابجسد..كل واحد من اهل البلد
واللى يحبج من صدگ وابشوگچ انطاچ العهد
ضل على ساعات الجمر مانام ليله وما رغد
ضل تايه امحير يجر حسرات چن فگدت ولد
تبجى وتنوح اعلى المهد
ضل مثل طير الشايه اجناحه ..ومن عشه انطرد
ذاک انه روحى امعلگه ثابت اضلن للابد
وانتى يزنبوة هلى مايضل زلفچ مأسور..
يلماتخونين الوعد

رحت يم البيه غيره وگتله امشنه وگال وين

گتله مادام الکمر امضوى الطريچ خل ندور اعلى الضايعين

گال ما نگدر عليهم
گتله شنهو السبب؟
گال الکمر هم امره بأيديهم

خاف نمشى اويأمرونه
ايغيب وأنضيع الطريچ
گتله حگ وگوم امشنه

رحنه دورنه عليهم
لگیناهم مثل نخل الماله والی بلزوايه امطشرین

رحنه سولفنه عليهم
محله فرتهم علينه
اودار حچی البیه معنی
اودارت السبحه بأديهم
وگال واحد هذا واجب كل شخص لازم يعرفه
لچن انه الوکت ماخذنی اوبعد ما عندی فرصه

اورد علیه الثانی بسبحته ایطوطح
ویومی ابچفه
گال ما نگدر عليهم های کلفه
وگال ثالث یاجماعه احنه اشبدینه
خاف های اتصیرفتنه
وگال رابع الحگ معاکم شورکم محد یخلفه

وکنر حچی الماله رأس
اوهذه حال الماله رأس
وگال ذاک وگال هذه وگال ذاک
اشلون صارت ماعرفنه
وراحت ایام وشهور
وانه اعدن بالثوانی
اعلی الجمر گلبی یفور
بالشمس ضلیت واجف
فوگ حگی النوب خایف
گلبی ما یقبل سوالف

ذاک اهو السلطان واسباع ونسور

ياهو الينطينى چفه
ياهو الينطينى ايده ..ايگلى گوم الوكت طاب
هذه مو ماى اليغرج لا تخاف من السراب
واليريد ايعيش بالعز ..لازم ايطب الصعاب
واليريد ايعود ولفه ..مايخاف من الذياب

مات كلمن صبر للذل
بس نفس يمشى اعلى عرض الغاع
مو تحت التراب
ذول ما شربو عذب ماء الحيات
ذول ما دارين شكل السمه اشلونه
ابكثر ما دنگو لاوين الرقاب
ذول باعو شرف ..وابتاعو عذاب
وانه اضحى ابدم وريدى الكل شهم
ضحى بچلمتين على دربه ..وما يهاب

اه يا ايدى اشكثر سالمتم بيچ
ناس ما حنو عليچ يا ثجيله من العتب چنچ غريبه
الغصن لو يثگل على امه اتسانده اغصان الجريبه
محله لو ينجرح عاشگ
ايصيح محبوبه ويرد للباب ينزف
ينزف وولفه يجيبه
ويغسل ابدمعات حبه
اجروح تجرى
اويسگى گاع الماروت غير المصيبه

ابهيده يلتمشى على نحر الغاع
جدمك حمر صار
اغصون طاحت وانصبغ وجه الغبار
او هذا مو جمرة صبح باول نهار
هذا دم عشاگ ما لبسو العار
دم نزیف اجروح ورد الجنار
دم ضحایا الحب ابمعبد النار
های دمعات الاحبه اعلى الديار
های قصه حب تضل بین الکبار
ایسولفون اشلون معنى الحب
یضل بین الصغار

وتحزمت وحدى وگمت والشوگ ماخذنى وهمت
گالولى لا تمشى ابخطر بالک تمر اعلى الزور
دربک خطر ما ينسحک بالک تمر اعلى الهور
یحچون واشراع الهوى صوب الولف بیه ایدور

طبیت ساحات الخطر والگیت ناس من النور
حمر الجفافی امحزمه واعیونهم من بلور
سلمت گالولى هله شترید گول احنه اندور
گاتلهم امضیعOLF ماخوذ منى ومقهور
هزو تفگهم وانتخو گالو ابهلل انثور
بالقوه یرجع والزلم ولفک الماخوذ ابزور

کتبت القصيدة 1982